

ALVASCHAGN: ena tgesa da maz è an planisaziun

Ena tgesa da maz vess ena clera prioritad

pb. Gio d'en taimp ins ò pudia santeir tgi la mazlareaia Fischbacher da Tusang planisescha ena tgesa da maz ainten la zona d'industria ad Alvaschagn. Igl project è mecta madeir ed è nia preschento la seira da discussiun a Casti. La tgesa da maz duess er esser d'avantatg per la regiun. Principalmaintg per la vendita directa digls pours.

La mazlareaia Fischbacher a Tusang dattigl ossa gio 29 onns. Erhard Fischbacher ansemen cun igl sies erhl Maik fon marschar igl travagl cun ena buteia a Tusang, ena pitschna ad Andeer e da nov er a Coira. Dasperas la buteia a Tusang dattigl la mazlareaia, la setgantera e noua tgi la tgerm vign elaborada tar igls differents products.

La clientella è fitg diversa, ena gronda part è però igls pours sez. Per els vign taglea se igls animals tgi von ainten la vendita directa e la tgerm vign proporziunada a vacumada lò. Dasperasx porscha la mazlareaia Fischbacher er en sarvetsch da catering. Igl problem dall'interpresa è tgi els on mengia pac plaz e betg tot agl madem li. Lò noua tgi els èn igl mument dattigl nignas pussebladads da sa sviluppar e taragn da biagier a Tusang è stgers. Uscheia on els piglia an vista da realisar ena tga da maz ad Alvaschagn.

Nigna expansiun

Maik Fischbacher tgi magna ossa la mazlareaia ò managea tgi dad eir ordvart la regiun seia per els betg en segn dad expansiun. Els vighian simplamaintg tschartger per els ena buna schliaziun a lunga vista. Alvaschagn seia ord vista dalla distanza nign problem ed anssomma ainten ena direenziun tgi els seian er schiglio activs. Zont cun igls pours dalla Val Alvra. La parcella ainten la zona d'industria ad Alvaschagn seia er gist dasperas la veia cantunala. «I vo per nous betg per expandar scu interpresa. Nous lagn restar ena mazlareaia tgi è manevla agls sies cliaints, tgi ò ena cunsegliaziun persunala e nous la dar anavant gronda atenziun alla qualitat», ò managea Maik Fischbacher. Per saveir luvrar da maniera pi efficiainta dettign navot oter tgi en bietg nov tgi cuntigna tot las localitads tgi ins dovra ozande per en travagl en tant modern. Oz a Tusang seian els aint a tschains, els vegian nigla pussebladada da saveir corresponder allas normas dalla UE. Er schi vigna strousch ad esser lour fegnameira dad expor-

tar lour products u da furneir a distributours gronds tgi vendan las liongias 2.- fr. pi bungmartgea tgi els ainten lour atgna buteia. Damais da far quasi concorrenza a sasez. Igl mument vegian els er nign salv da vacumar per la clientella e las localitads per setgantar seian orsouara.

Anc dumondas avertas

Ins è gio pi dei vedlonder cun la planisaziun. Ins spera ossa da saveir eir bagnspert ved la realisaziun. Gio igl onn proxim. Igl areal tgi vign surbiagia cun la nova tga da maz ò ena surfatscha da 580 m² e las investiziuns èn calculadas cun 2.8 miu.

Chegl tgi è igl mument anc betg cler è la furma da dretg tgi la societad purtadra duess survagneir. Mademamaintg è er la furma dalla finanzaziun betg digltot reglada. Scu tgesa da maz regiunala metta er igl cantun e la confederaziun a disposiziun contribuziuns da sustign per tals projects. Er lò èn las pussebladads anc avertas.

Aint igl Grischun central dattigl gio ena tgesa da maz a Tgazzas. Chella è però suroccupada ed igls pours on magari ena glista da spetga da ples meis. Uscheia fiss ena tgesa da maz ad Alvaschagn er ord chella vista bagnneida. Zont per igls pours da Surmeir tgi vessan siva er betg en viadi schi lung.

Er da vart dalla tgatscha dattigl per igls catscheders dalla Val Alvra igl mument nign post da controlla ainten lour regiun. Els on la

pussebladada dad eir a Cunter u a Savognin u schiglio a Tusang.

Ainten la nova tga da maz ad Alvaschagn desigler ena partiziun separada per selvaschigna, noua tgi igls catscheders savessan lascher tagler se, proporziunar e vacumar la tgerm per lour clientella.

Strousch an cumbinaziun

Digls preschaints all'infurmaziun a Casti ins less dar ena clera prioritad alla tgesa da maz anvers en center logistic per products regiunals. Ena tgesa da maz seia en basigns absolut e duess er neir sfurzada aint igl taimp. Gl'è er nia la dumonda, schi ins savess betg far la cumbinaziun dalla tgesa da maz cun igl center logistic per products regiunals. Glez manegia Maik Fischbacher pitost betg. Per l'egna vegia la tgesa da maz en concept, noua tgi mintga salv vegia la sia muntada e tot è planiso tenor ena tscherta logica risguardond igls divers pass da producziun. Pinavant vegia el er dubis tgi ainten ena tgesa da maz, noua tgi la tgerm seia la materia prima ins saptga er neir cun products da tot oter gener. «La manetg tgi ins vess lò er fadeia da survagneir las lubientschas perveia dallas prescripziuns».

Er schi la tgesa da maz duess aveir prioritad, vot chegl betg deir igl center logistic per products regiunals seia nign tema ple. Anzi, ins duess er esser activ cun chest project, schi er cun pass pi pitschens e fors an en tempo manc sforzo.



Maik Fischbacher declera agls preschaints a Casti la concepziun digl project per ena tgesa da maz ad Alvaschagn.